



Bentiaraq Ottosen
Atassut

UKA 2024/123
23. oktober 2024

**Pineqaatissinneqarsimasut tarnimikkut nappaatillit paaqqutarineqartarnerat
katsorsarneqartarnerallu pitsaanerpaaffissaminniitinniarlugit aningaasatigut,
allaffissornikkut peqqinnissakkullu sulisunik nukissanillu qanoq qularnaarisinnaanitta
misissorneqarnissaa siunertaralugu nassuiaasioqqullugit Naalakkersuisut
peqquneqarnissaanik Inatsisartut aalajangiiffigisassaattut siunnersuut. Nassuiaat UKA 2025
nallertinnagu Inatsisartunut agguanneqassaaq.**

(Inatsisartunut ilaasortaq Anna Wangenheim, Demokraatit)

Siullermik siunnersuuteqartoq pisariaqarluinnartumik aaliangiiffigisassatut siunnersuummut qaqitsininni Atassummiit qujassuteqarfigaatsigit. Una siunnersuut isumaqarpunga peqqinnissaqarfitta aningaasaqarneranut attuumassuteqarluinnaqqissaartuusoq. Taamaattumik Atassummiit imaattumik saqqummiussissaagut.

Naluneqanngitsutut Peqqinnissaq pillugu isumaqatigiisummi atsioqataasimavugut, tamatuminnga tunngatillugu iluarsartuuseqqinnissat pingaarutillit peqataaffigiumallugit. Partiit tamatta peqqinnissaq pillugu politikkileraangatta isumaqatigiissutigisinnaasatsinnik partiit akimorlugit suliaqarnissarput pulaffigalugu suliaqartarpugut, tamanna Atassummiit soqutigilluinnarparput una siunnersuut oqallisiginissaa aaliangiiffigalugulu.

Pineqaatissinneqarsimasut inissiisarfiani tarnimikkut nappaatillit pillugit pingaaruteqarluinnarpoq eqqartorneqarnissaat, uani pineqartut eqqarsaatigalugit Atassummiit oqariartuutigerusupparput konto pineqartoq 34.11.11 qiviaqqullugu. Tassani pineqarmata ”Tarnikkut napparsimasunik inissiisarfimmu Pinerluttulerinermut Inatsit malillugu inissiineq). Aningaasaliissutit inatsisitigit pisussaaffiliisut peqqinnissaqarfitta iluanut, tassani pineqartut aningaasaliissutini 17,8 mio. kr-iupput. Pinerluttulerinermi Inatsimmi §240 naappertorlugi Kapitali 33 malillugu eqqartuuneqarsimasut. Taakkua suliaassami kisitsisissatut naatsorsuutigisat 3,4 mio. kr-inik inissaq naleqartoq oqaatigineqarpoq. Tassungalu ineeqqamut, katsorsartinnermut tunngassuteqartut, taamatullu Risskov-imut tarnimikkut napparsimavimmut (psykiatrisk hospitalimut) inissinneqartartut pillugit.

Erseqqissarusuppara aningaasaliissutit taakkua peqqinnissaqarfitsinnut aningaasatigut artukkiinerat pineqarmata, tassani pineqartut pillugit Qallunaat Nunaata oqartussaaffigisaanni eqqartuusiveqarnikkut aaliangigaasut oqaatigisinnaagatsigit. Taamaattumik qiviarneqartariaqartoq

isumaqarpunga, aningaasat pineqartut annertummata peqqinnissaqarfiullu aaliangingarinnngisaanik aningaasartuuteqarfigineqarmata. Eqqartuusiviup aaliangigarisaanik peqqinnissaqarfiup aningaasartuutigalugit, taamatut iliuuseqarnek isumaqarpunga allanngortinneqartariaqartoq.

Peqqinnissaq pillugu isumaqatigiisummi suliassarineqartut eqqarsaatigalugit, sammisaq 5-imi allaqqasut eqqarsaatigalugit sanaartornissaq ukiuni tulliutuni qulini ingerlanneqartussa q takuneqarsinnaalluni. Periarfissat taakkua eqqarsaatigalugit aningaasalersueriaatsit eqqarsaatigalugit pineqaatissinneqarsimasut tarnimikkut nappaatillit paaqqutarineqartalnissaat pillugu pilersarusiortoqartoq oqaatigisinnaavarput, tassungalu tunngatillugu Atassummiit piumasarisimavarput suliat sukannersumik suliareqqullugit taamaattumik atsioqataasimalluta.

Peqqinnissaqarfippit ilungersunartumik inissisimasooq nalunngilarput sulisoqarniarnermigut aamma annertuumik unamminartumik inissisimavoq, taakkualu suliassat isumaqarpunga uukkatarineqartariaqartut tamatuminnngalu sammisaq 6 takuneqarsinnaassasut. Sakkussanik tunioraanissamat Atassummiit isumaqatiginninniarnermi oqariartuuteqarsimavugut ilinniakkat peqqinnissamat tunngasut piaarnerpaamik pitsanngorsaavigineqassapput, tamanna qulakkeerumallugu peqqinnissamat ilinniartuorsimasut tamaasa pigineqalernissaat anguneqassamat.

Atassummiit pingaartissimavarput Peqqinnissaqarfik pitsaasumik ineriartortinneqassasooq, tassami inuup peqqissusaa pingaarnerpaavoq, aningaasat eqqartorneqartillugit inuup peqqissusaa taana tamanit pingaarnerpaamat. Atassummiit allannguutissatut siunnersuut saqqummiupparput: **Naalackersuisut Naalagaaffiup oqartuissaasuinut saaffiginninnissaat pillugu tarnimikkut nappaatillit Pinerluttulerinermi inatsimmi §240 naapertorlugu Kapitali 33 malillugu eqqartuuneqarsimasut pillugit aningaasatigut Qallunaat Nunaat aningaasatigut akisussaasuunissaannik peqquneqarnissaannik Inatsisartut aaliangiiffigisassaattut siunnersuut saqqummiussagaat.**

Isumaqaratta taamatut suliaqartitsisinnaaneq peqqinnissaqarfiup iluani aningaasatigut artukkiingitsumik inissittoqassasooq, tassani pineqarmata aningaasartuutit qaffariartuinnarnissaat. Peqqissutsimut Naalackersuisoqarfiup tamanna uppersarlugu oqariartuutigaa, suliarli tuaviortumik Qallunaat Nunaanut aningaasatigut akisussaaffigineqalernissaa Atassummiit oqariartuutigaarput. Uani pineqarmat peqqinnissaqarfitsinnut aningaasat kalluaasut, peqqinnissaqarfitta aaliangingarinnngisaanik iliuuseqarnerummat.

Taamatullu qiviarneqartariaqartoq tassaavoq ”Kalaallit Nunaanni pinerluttulerinermi inatsimmi nr. 306, 30. april 2008-meersumi §240 naapertorlugu Kapitali 33 malillugu eqqartuuneqarsimasut, taamatullu Kapitali 33 §157 imm. 2-imiittut imaluuniit Kapitali 28 aalajangersakka malillugit nakkutigisassanngortitsisinnaaneratt”.

Oqarnitsuut nunatsinni oqartussaaffiit akisussaaffiginngisagut aningaasatigut
anigaasalersugassarinningsigit taamatut allannguutissatut siunnersuuteqarpugut,
eqqartuusiveqarfiit inatsisinut ministereqarfiup akisussaaffigimmatigit.

Taamaattumik allannguutissatut siunnersuut ataatsimiititaliamut suliareqqitassanngorlugu
Atassummiit innersuupparput.